

PM Lancar Skim Pelaburan Baru di Bawah ASNB
mStarOnline
18 Mac, 2013
Oleh NICHOLAS CHENG

SERDANG: Perdana Menteri, Datuk Seri Najib Tun Razak pada Ahad melancarkan skim pelaburan baru, pengisytiharan amanah serta hibah amanah di bawah Amanah Saham Nasional Berhad (ASNB) yang akan memberi manfaat kepada lebih daripada 11 juta pemegang sahamnya.

Perkhidmatan Hibah Amanah dan pengisytiharan amanah disediakan bagi pemegang Islam dan bukan Islam, ia dilancarkan sempena sambutan ulang tahun Permodalan Nasional Berhad (PNB), ke-35.

Beliau berkata pendaftaran kedua-dua perkhidmatan itu boleh didapati di pejabat ASNB seluruh negara mulai Isnin.

"Perkhidmatan baru yang disediakan ini akan membantu pemegang saham ASNB dalam merancang harta mereka terutamanya berkaitan dengan unit amanah ASNB, supaya ia akan diagihkan kepada keluarga mereka melalui proses yang lebih mudah dan cepat," katanya di Taman Ekspo Pertanian Serdang (MAEPS).

Hibah Amanah ialah satu perkhidmatan sejajar dengan Syariah yang berkaitan konsep "mempercayai dan membenarkan" dalam pengurusan sementara Pengisytiharan Amanah pula berkaitan konsep amanah, kata PNB dalam satu kenyataan.

Di bawah skim ini, pemegang amanah yang meninggal dunia secara automatiknya aset mereka akan dipindah milik kepada keluarga masing-masing atau insan yang mereka sayangi.

Untuk mendaftar, pemegang saham mesti berumur 18 tahun ke atas.

Waris tidak kira sama ada rakyat Malaysia atau rakyat asing namun mereka mesti mempunyai pertalian darah atau hubungan langsung dengan pemegang saham.

Hakcipta Terpelihara © 1995-2013 Star Publications (Malaysia) Bhd

Source:

http://mstar.com.my/berita/cerita.asp?file=/2013/3/18/mstar_berita/20130317233829&sec=mstar_berita